

RED Democrático ta para tras di candidatura di Oriana Baez

Recientemente e lista di candidatonan politico cu kier participa den eleccion di dia 6 di december a bira conoci, caminda ya caba a cuminsa bay viral videonan di un candidato specifico di partido RED Democrático riba cual e partido a reacciona y a señala cu “ta purba desacredita RED of su candidatonan a todo costo.”



Den e lista di candidatonan di RED Democrático tin un hoben di nomber Oriana Baez ken ta conoci como un persona hopi activo riba rednan social. Baez ta candidato number 3 y a trece su propuestanan dilanti y a indica cu: “como creador di contenido, ta comprende e frustracion di no tin ningun facilitacion riba transaccionnan internacional. Esaki ta un di e motibonan cu mi a perde motivacion pa sigui crea contenido.

P’esey mi a bin cu un plan pa resolve e problema aki.

1. Marco Regulatorio:

- Modernisa regulacion: Actualisa y simplifica e regulacion di banco y finanzas pa acomoda transaccion digital, asegurando cu e ta favorable pa pago internacional.

- Guia claro: Establece un guia claro pa obligacion di impuesto, tasa di conversion, y comisionnan pa transaccionnan internacional pa au-

menta transparencia.

2. Alianza cu Banco:

- Colaboracion cu banco local: Traha cu banco local pa desaroya alianza cu plataforma di pago internacional (PayPal, Stripe, etc.) pa simplifica e proceso di transaccion.

- Mehora servicio di banco: Incorpora banco pa ofrece un cuenta cu ta optimisa pa ricibi pago internacional, cu menos comision y mas lihe den tempo di transaccion.

3. Infraestructura tecnologico:

- Innovacion Fintech: Apoya e establecimiento y crecimiento di compania Fintech cu ta facilita pagonan internacional a traves di innovacion local.

“Implementando un combinacion di e medidanan aki, por crea un ambiente mas favorable pa creadornan di contenido, traders, y otronan

cu ta depende riba transaccionnan internacional,” el a sigura.

Loke a hala atencion di comunidad ta cu Baez ta un creador di contenido na Aruba y recientemente a eliminat su videonan pa motibo cu awo el a dicidi di cambia su estilo di bida convirtiendo pa religion Musulman, segun loke e mesun partido a sigura.

Mirando cu campaña electoral ta activo, Aruba no ta diferente, mescos cu na otro paisnan unda contrincantenan tin e strategia di publica cierto informacion priva di candidatonan pa purba di “desacredita nan” manera RED Democrático ta sigura.

Pa esaki, den un conferencia di prensa di diahuebs ultimo, lider di partido, Ricardo Croes a trece dilanti cu “un facebook page cu ta yama ‘E

Berdad’ a publica un video e cual ta purba atacha credibilidad di nos candidatonan, a base di nan pasado. Shonnan laga mi corda boso nan cu lo cual mi ta papia di e gobierno actual no ta nan pasado so, ta nan presente. Ex-minister Glenbert Croes ta sospechoso aworaki, ex-minister Endy Croes ta sospechoso as we speak, Chris Romero ta sospechoso y pa esunnan cu ta bisa ‘si pero nan no ta riba e lista mas’ bo kiermen ora e corrupto, ladron, malversado no ta riba e lista, esey ta haci e partido integro de repente? No..absolutamente cu no,” el a bisa.

Pa e partido, e pasado di Baez no ta algo cu un peso grave na momento di bira candidato pa motibo cu tin di haber cu su bida personal anteriormente. Loke ta conta ta cu e no tin un pasado den cual e tabatin problema cu husticia.

HTC y CURPA tambe a yega 586 firma y ta segura nan participacion den eleccion

Ayera a culmina e prome cinco dia di colectamento di firma pa partidonan politico por participa na eleccion di dia 6 di december. Di e 8 partidonan, FUTURO, PPA, RED, CURPA, HTC, UPP, MIA y LPR, cu mester a colecta un total di 586 firma, seis a logra yega na e cantidad necesario.

Manera ta conoci despues cu entregamento di lista di partidonan politico a tuma lugar diabierna 18 di october, e partidonan politico cu no tin asiento den Parlamento di Aruba mester a colecta un total di 586 firma pa por participa den e siguiente eleccion parlamentario cu ta tuma lugar dia 6 di december.

E proceso di colectamento di firma a cuminsa dialuna 21 di october y e prome partidonan cu a logra yega na e cantidad necesario riba e prome dia tabata partido FUTURO, lidera pa parlamentario independiente Gerlien Croes. Aunke parlamentario Croes tin un asiento den Parlamento na e momentonan, su partido ta uno nobo y por lo tanto toch mester a colecta e firmanan necesario.

Partido PPA, cu aworaki ta ser lidera pa politico Otmar Oduber, tambe a yega na 586 firma riba e prome dia di colectamento di firma.

Durante siman e siguiente partidonan cu a logra yega na e cantidad di firma necesario tabata partido LPR (Lucha pa Reforma), lidera pa parlamentario independiente Ryccond Santos do Nascimento y partido RED Democrático lidera pa politico Ricardo Croes.

Ayera durante dia otro partido cu a yega 586 firma tabata partido HTC lidera pa e hoben Gilbert Webb, ken tabata un topico di combersacion riba rednan social. Hopi usuario di Facebook tabata comenta tocante su esfuerzo durante henter siman cu na final a yudele yega na 586 firma y sigura participacion di su partido den eleccion dia 6 di december.

Otro partido cu tambe a yega 586 firma ayera durante dia ta partido CURPA lidera pa politico Eric Ras.

Dos partido cu ainda falta colecta firma pa sigura nan participacion den eleccion ta partido MIA (Movimiento Indigena Arubano) lidera pa Sr. Helena Croes y partido UPP, lidera pa Sr. Giovanni Trim.

E actualisacion di ayera di 3or di atardi di Consejo Electoral di Aruba tabata indica cu partido MIA tabatin 46 firma, faltando 540 pa yega e cantidad necesario; y partido UPP

tabatin 51 firma, faltando 535 firma pa yega e cantidad necesario.

Ainda tin dos dia di colectamento di firma cu ta bay tuma lugar, dialuna 28 di oc-

tober y diamars 29 di october cu ta duna e dos partidonan aki un oportunidad pa talbes logra yega 586 firma pa por participa den eleccion.

Aunke pronostico actual-

mente ta cu e partidonan aki no ta bay logra bay eleccion mirando cu nan tabatin menos cu 100 firma, segun e actualisacion di 3or di atardi di ayera di Consejo Electoral di Aruba.

Tara Lounge & Elements Restaurant *Embark on Exciting Renovations!*

The award-winning Elements Restaurant and Tara Lounge are being revamped with elegant, eco-friendly designs, unveiling new planet-forward menus for both the restaurant and its famous Sunday Brunch

THE TARA LOUNGE
REOPENED **OCTOBER 15**

ELEMENTS WILL DEBUT
ITS RENOVATED LOOK ON **DECEMBER 15**

Experience exceptional dining and a new View to Dine For at Bucuti & Tara Beach Resort, Aruba's top-rated resort!

